

Script of Evening Gojri News Bulletin

02 February 2025 at 1700 Hrs

ایوننگ گو جری نیوز بلیٹن مورخہ 02 فروری 2025

یوہ آکا شوانی جموں ہیبیاغ علی طاہر تے عبدالرحمن تیں خبر سُنو۔ پہلاں خاص خاص خبر۔

*1۔ صدر تے وزیر اعظم نے بسنت پنچمی غا موقع ور لوکاں نانہ مبا رک دتی ہے۔

*2۔ جموں کشمیر غی کرکٹ ٹیم نے رانجی ٹرافی ٹورنامنٹ غا الیٹ گروپ اے مانہ بروڈہ نانہ 182 دوڑاں سنگ ہرا غے تا ریخ رقم کر تاں واں کو ارثر فائنل مانہ جگہ بنا لی ہے۔

*3۔ جموں کشمیر نے اپنا ملازماں غی طرفوں پراپرٹی ریٹرن پھریا جان غی آخری تا ریخ مانہ آئندہ 15 فروری توڑی توسیع کر دتی ہے۔

*4۔ بھارت نے خواتین غی 19 سال تیں کھٹ عمر غا ضمیرہ مانہ ٹی ٹوانٹی عالمی کپ مقابلہ مانہ جنوبی افریقہ نانہ ہرا دتو ہے۔

*5۔ تے محکمہ موسمیات غو کہنو ہے جے آئندہ 10 فروری توڑی جموں کشمیر مانہ رُک رُک غے برفباری تے بارشاں غو امکان ہے۔

خبراں غی تفصیل نال پہلاں باغ علی طاہر۔

Prez/ PM- Basant Panchami

آج پورا ملک مانہ بسنت پنچمی غا موقع ور سرسوتی پوجا کی جا رہی ہے۔ اس موقعہ ور لوگ سرسوتی ماتا یعنی علم و دانش غی دیوی غی پوجا کریں۔ یوہ تہوار موسم بہار غی آمد غو وی مظہر ہے۔ صدر جمہوریہ دروپدی مرمو تے وزیر اعظم نریندر مو دی نے قوم نانہ مبا رک دتی ہے۔ سماجی میڈیا ور دتا گیا آپنا اک پیغام مانہ صدر جمہوریہ نے اُمید ظاہر کی ہے جے خوشی غو یوہ تہوار جہیزو تعلیم سنگ منسلک ہے، لوکاں واسطے خوشحالی تے تعلیم مانہ ہور باندو کرے گو۔ اس دن غی اہمیت ور لوہ پاتاں واں صدر نے دُعا کی ہے جے بھارت دُنیا واسطے علم و دانش غو اک گہوارو بن غے اُبھرے۔ سماجی

میڈیا غی پوسٹ ور وزیر اعظم نریندر مو دی نے وی لوکاں نانہہ بسنت پنچمی غی مبارک دتی ہے۔

Ranji Cricket

جموں کشمیر نے رانجی ٹرافی گروپ اے غا میچ مانہہ بروڈہ نانہہ 1 سو 82 دوڑاں سنگ شکست دے غے شاندار کامیابی حاصل کی ہے، تے کو ارثر فائنل مانہہ جگہ بنا لی ہے۔ اس طرح اس جت نال جموں کشمیر نے اک تا ریخ رقم کی ہے۔ ٹاس جت غے پہلاں بلے بازی کرتاں واں جموں کشمیر نے پہلی باری مانہہ 246 دوڑاں غو مضبوط سکور بنایو، تے اس غے بعد دوجی باری مانہہ 2 سو 84 دوڑ بنائیں تے اس طرح بروڈہ نانہہ جت حاصل کرن واسطے 3 سو 65 دوڑاں غو مشکل ہدف دتو گیو۔ بروڈہ غی ٹیم پہلی پاری مانہہ صرف 166 دوڑاں ور آؤٹ ہو گئی تے دوجی پاری مانہہ وی جدوجہد کرتی رہی۔ جت واہ صرف 182 دوڑ بنا سکی۔ جموں کشمیر غی بلے بازی و بالینگ مانہہ شاندار کارکردگی نے اُنہاں نانہہ اک زبردست جت کرویائی تے اس کا میابی نے اُنہاں نانہہ ٹورنامنٹ غا کوارٹر فائنل مانہہ پہنچا دتو۔

Spl Trains

بسنت پنچمی غا موقعہ ور یا تریاں نانہہ مہا گنہہ میلہ پریاگ راج مانہہ آرت سنان غی خاطر لے جان واسطے 4 سو اضافی ریل گڈیاں غو اہتمام کیو گیو ہے۔ اس راہ لکھاں غی تعداد مانہہ یا تری بلا رکا وٹ پریاگراج غو سفر کر سکیں گا۔ آکاشوانی غا مہا را نمائندہ نے جانکا ری دیتاں واں دسیو ہے جے تیجو آمرت سنان پہلک انجام دتو جا ئے گو۔ محکمہ ریلوے غی طرفوں یا تریاں غی پہیڑ غے پیش نظر بہتر انتظامات کیا گیا ہیں، تا نجے بسنت پنچمی غا موقعہ ور یا تریاں نانہہ کسے بے آرامی تیں بچایو جا سکے۔ آکا شوانی نیوز سنگ گل کرتاں شمال وسطی ریلویز غا چیف پہلک رلیشن افسر ششی کا نت تریپاٹھی نے دسیو ہے جے ریلویز غی طرفوں مانی اما وسیا غی طرز ور ہی بسنت پنچمی غا موقعہ ور وی انتظامات کیا گیا ہیں۔

Udh Basant Panchami

بسنت پنچمی غو تہوار اُدھم پور مانہہ وی بڑی گرمجوشی تے مذہبی عقیدت سنگ منایو گیو۔ اس موقعہ ور علم ودانش غی دیوی ماتا سوسوتی غی پوجا کی گئی۔ بزرگ شہریاں واسطے بنائی گئی رہا ئش گاہ غا احاطہ مانہہ دفتر غا سٹاف اہلکاراں تے سٹینر سیٹرن کلب اُدھم پور

غا ممبرا، نالے اُلڈ ایچ ہوم مانہہ ٹھہرایا گیا بچاں غی طرفوں اس تہوار غی مناسب سنگ بکھ بکھ ثقافتی پروگرام پیش کیا گیا۔ جا گرتی اُلڈ ایچ ہوم غی سالانہ میٹنگ وی اج منعقد ہو ئی۔ جس مانہہ سالانہ رقومات مختص کیا جان غو فیصلو کیو گیو۔ پورا ضلع مانہہ بکھ بکھ مقامات ور بھنڈاراں غو وی اہتمام کیو گیو۔ اس موقعہ ور بولتاں واں جاگرتی اولڈ ایچ ہوم غا صدر جگل کشور گپتا نے دسیو۔۔۔ بائٹ۔۔۔

Lifetime Achievement

سابق بھارتی کرکٹر تے بھارت رتن سچن تندولکر نانہہ کل سی کے نا نڈو زندگی غی حصولیاں غا اعتراف مانہہ اعزاز سنگ نوازیو گیو ہے۔ یہ ایوارڈ بھارت مانہہ کرکٹ بارے بورڈ آف کنٹرول یعنی بی سی سی آئی نے کل ممبئی مانہہ منعقدہ نمونہ اعزاز 2025 مانہہ دتا۔ سچن تندولکر نانہہ آئی سی سی چئیرمین جے شاہ نے 2 دہائیاں تک بھارتی کرکٹ مانہہ بے مثال خدمات ور اعزاز سنگ نوازیو ہے۔ دوجا اعزاز حاصل کرن آلاں مانہہ بھارت غا تیز گیند باز جسپریت بمرہ شامل ہیں۔ جنہاں نانہہ 2024 مانہہ شاندار کارکر دگی غے باعث بہترین بین القوامی کرکٹر واسطے معزز پولی امریگر اعزاز سنگ نوازیو گیو۔ بھارتیہ خواتین کرکٹ ٹیم غی نا ئب کپتان سمرتی مندھانا نانہہ چوتھی وار بہترین بین القوامی کرکٹر خواتین غو ایوارڈ دتو گیو۔ ممبئی کرکٹ ایسو سی ایشن نانہہ 24/2023 غا بی سی سی آئی گھریلو ٹورنامنٹ مانہہ بہترین کارکردگی واسطے ایوارڈ ملیو۔ بی سی سی آئی نے آر اشون نانہہ وی اعزاز دتو، تے اُن غی عزت افزائی کی، جنہاں نے بارڈر گو اسکر ٹرافی غا نتیجا ٹیسٹ تیں بعد اپنا بین القوامی کرکٹ تیں ریٹائر منٹ غو اعلان کیو۔

Announcement

ریجنل نیوز یونٹ آکاشوانی جموں غی طرفوں آج رات 8 بجے مرکزی بجٹ سال 26/2025 بارے 45 منٹاں ور مبنی اک خصوصی پروگرام نشر کیو جا رہیو ہے۔ اس پروگرام غے دوران زندگی غا بکھ بکھ شعباں سنگ تعلق رکھن آلا ماہرین بجٹ ور اپنور د عمل ظاہر کریں گا۔ اس پروگرام نانہہ آکاشوانی جموں تیں میگا واٹ 9 سو 90 کلو ہٹز، 104 عشاریہ 5 میگا ہٹز تے 100 عشاریہ 3 ایف ایم ور سنیو جا سکے گو۔ اس پروگرام بارے سامعین اپنی رائے غو اظہار آر این یو جموں @ جی میل ڈاٹ کام ور کر سکیں۔

مزید خبراں نال عبدالرحمن شاہین۔ ور اُس تیں پہلاں یوہ پیغام۔(یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن ائیر ڈاٹ گوو ڈاٹ ان ور وی (دستیاب ہیں، اس تیں یہ خبر مہاری مو بائل ایپ تے ڈی ٹی ایچ ور وی دستیاب ہیں)

PRS Deadlines

جموں کشمیر سرکار نے اپنا ملازماں غی طرفوں سالانہ پراپرٹی ریٹرن پھرن غی آخری تاریخ مانہ ہُن آئندہ 15 فروری توڑی توسیع کر دتی ہے۔ یہ توسیع بڑی تعداد مانہ ملازماں غی طرفوں جا ئداداں با رے سالانہ ریٹرن نہ پھریا جان غی وجہ نال کی گئی ہے۔ اس توں پہلاں پراپرٹی ریٹرن پھرن غی آخری تاریخ 31 جنوری مقرر کی گئی تھی۔ 15 فروری توڑی جا ئداداں با رے سالانہ ریٹرن نہ پھریا جان غی پاداش مانہ ایسا ملازماں غے خلاف سخت کاروائی کی جائے گی۔ یہ ریٹرن پھریا جان غا سلسلہ مانہ درپیش کسے مشکل غی صورت مانہ مدد غی خاطر ای میل سپورٹس پی آر ایس @ جے کے ڈاٹ گوو ڈاٹ ان ور رجوع کیو جا سکے۔

MLA Banihal

بانہال غا ایم ایل اے سجاد شاہین نے مربوط بچہ ترقی خدمات یعنی آئی سی ڈی ایس سکیم غے تحت بانہال مانہ نوی پھرتی کی گئیں آنگن واڑی ورکراں تے بیلپراں مانہ تعیناتیاں غا آرڈر تقسیم کیا۔ اس قدم سنگ نکا بچاں غا پالن پوسن تے خوراک نالے مایاں نانہ مہیا کرائی جان آلی صحت خدمات مانہ ہو ر مضبوطی آویگی۔ اس موقعہ ور 15 آنگن واڑی ورکراں تے بیلپراں غا تعیناتیاں غا آرڈر تقسیم کیا گیا۔ اس موقع ور بولتاں واں ایم ایل اے سجاد شاہین نے آنگن واڑی ورکراں تے بیلپراں و بچاں غی بہبود تے خواتین غی خود اختیاری مانہ اہم کردار ادا کرن غی ضرورت ور زور پایو۔ اس موقع ور بولتاں واں بانہال غا ایم ایل اے سجاد شاہین غو کہنو تھو۔۔ بائٹ۔۔

ICC U-19 T20 WC

بھارت نے آئی سی سی غا 19 بہراں تیں کھٹ خواتین ٹی ٹوئنٹی عالمی کپ غو ٹائٹل کامیابی سنگ برقرار رکھتاں واں فائنل مانہ جنوبی افریقہ نانہ 9 وکٹاں سنگ شکست دے دتی ہے۔ یوہ میچ کو الالمپور ملیشیا غا بایو ایماس اول گراؤنڈ مانہ کھیڈیو گیو۔ گونگاری تریشا غی ناقابل شکست 44 دوڑاں غی اینگز نے نگے پر ساد غی قیادت مانہ بھارتی ٹیم نانہ با رواں اوور مانہ 83 دوڑاں غو بدف حاصل کرن مانہ مدد دتی۔ اُنہاں نانہ میچ غا بہترین کھلاڑی غو اعزاز وی دتو گیو۔ سنیکا چالکے نے وی 26 دوڑ بنائیں تے ناٹ آؤٹ

رہیں۔ اس تیں قبل جنوبی افریقہ غی ٹیم صرف 82 دوڑاں ور ٹھیر ہو گئی۔ بھارتی بلے با زگو نگاری تریشا اس عالمی کپ مانہ سب تیں زیادہ دوڑ بنان آلی کھلاڑی بن غے اُبھریں۔ اُنہاں نے 3 سو 9 دوڑاں غو سکور بنایو تے ٹورنامنٹ غا کھلاڑی غو اعزاز حاصل کیو۔

Weather

محکمہ موسمیات غی طرفوں پیشنگوئی کی گئی ہے جے جموں کشمیر غا کُجھ حصاں مانہ 10 فروری تک رُک رُک غے بارش تے برفباری ہو سکے۔ محکمہ موسمیات غا سرینگر مانہ مرکز غا اک عہدیدار غے مطابق اج موسم عام طور ور آبر آلود رہ گؤ۔ اُنہاں غے مطابق شام تک موسم بارش آلو بن سکے۔ تے پلک دیر رات تک کئی اُچی جگہاں ور ہلکی بارش تے برفباری پے سکے۔ عہدیدار غے مطابق 4 تے 5 فروری نانہ موسم آبر آلود رہ گؤ تے ہلکی بارش تے برفباری غا امکان ہیں۔ تے 6 تیں 8 فروری تک موسم غی حالت آبر آلود مگر خشک رہن غو امکان ہے۔ اُنہاں نے مزید پیشنگوئی کی ہے جے 9 تے 10 فروری نانہ جموں کشمیر غا اوچا تے دور دراز علاقاں مانہ فر دوبارہ ہلکی بارش تے برفباری ہو سکے۔ محکمہ موسمیات غی طرفوں سیلانیان ، مسافراں تے ٹرانسپورٹراں نانہ مشورو یتو گیو ہے جے وے انتظامی عہدیداراں تے محکمہ ٹریفک غی صلاح غے مطابق ہی اپنو سفر کریں۔

Urs

راجوری غا دسٹل سیراں گراں مانہ معروف صوفی بزرگ سائیں جان محمد غو عرس پاک 6 تے 7 فروری نانہ منایو جا رہیو ہے۔ زیارت شریف غی انتظامیہ کمیٹی غے مطابق درود و ازکار تے ختمات المظلمات غی محفلاں توں بعد 7 فروری بروز جمعہ نانہ سویرے 11 بجے اُت دعائے کُل وے گی۔ جت سینکڑاں لوکاں غی شرکت متوقع ہے۔

Elderly Helpline

محکمہ سماجی بہبود غی طرفوں بزرگ شہریاں واسطے پورا جموں کشمیر مانہ اک ہیلپ لائن جاری کی ہے۔ یاه ہیلپ لائن روزانہ سویرے 8 بجا تیں شام 8 بجا توڑی دستیاب رہ گی۔ بزرگ شہریاں غی ضروری مدد غی خاطر یاه ہیلپ لائن جاری کی گئی ہے۔ جس مانہ اک تربیت یافتہ ماہرین غی ٹیم بزرگ شہریاں غی جذباتی امداد، قانونی صلاح تے اُن نانہ دستیاب بہبودی اسکیمیں بارے جانکاری دے گی، تا نچے بزرگاں نانہ ضروری امداد

مُیسر آسکے۔ یاہ ہیلپ لا ئن ہے 14567۔ اس طرح کسے وی مدد یاہ صلاح غی خاطر
بزرگ شہری ہیلپ لا ئن نمبر 14567 ور کال کر سکیں گا۔

اس غے نال ہی خبراں غو یوہ بلیٹن ختم ہوؤ۔